

Jangan jadi tong sampah sisa plastik

SAUDARA PENGARANG.

Menurut data Greenpeace, negara ini mengimport sisa plastik dari Amerika Syarikat sebanyak 31.20 peratus iaitu 195,444.46 tan metrik dari Januari hingga Julai 2018, berbanding Januari hingga November 2017 sebanyak 97.544 tan metrik. Terdapat peningkatan import sisa plastik mencecah 626,328.56 tan metrik dalam tempoh tujuh bulan dari Januari hingga Julai 2018.

Menurut statistik Kementerian Perdagangan Antarabangsa dan Industri, sisa plastik yang diimport mampu menjana pendapatan berjumlah RM30 bilion. Walaupun industri sisa plastik berpotensi menyumbang kepada pendapatan negara, kerajaan perlu mengambil kira aspek pengurusannya bagi mengelak pencemaran yang boleh mengganggu kesejahteraan kehidupan manusia dan ekosistem.

Bagi mengatasi isu sisa plastik import ini, Malaysia perlu mengambil langkah mengurangkan import jika tidak mahu digelar sebagai ‘tong sampah’ dunia. Sekatan sepenuhnya terhadap bahan ini dilihat mustahil untuk dilaksanakan kerana negara kita masih bergantung kepada bahan import ini untuk industri kitar semula.

Seterusnya beberapa langkah lain perlu diberikan pertimbangan serius untuk dilaksanakan jika kita ingin menguruskan sisa plastik diimport dengan efisien.

Pertama, mengenaikan levi ke atas sisa plastik

yang diimport. Pengenaan levi ini merupakan salah satu cara membolehkan sisa plastik yang dibawa masuk diperiksa untuk memastikannya sama dengan kelulusan dan bayaran levi yang dibuat.

Kedua, menubuhkan pasukan petugas khas bagi membanteras aktiviti pengilang tanpa lesen. Tindakan seperti mengenalpasti dan menutup kilang-kilang haram perlu dilakukan dengan segera berserta satu pelan tindakan untuk pembersihan dan pemulihian bagi kawasan-kawasan yang dijadikan tempat buangan dan pembakaran terbuka untuk sisa plastik ini.

Akhir sekali, semua pihak berkepentingan di dalam industri pengurusan sisa plastik perlu mempunyai satu mekanisme untuk memastikan ketelusan dan kepatuhan kepada undang-undang yang telah ditetapkan dalam pengurusan bahan ini.

Negara kita sebenarnya kaya dengan pelbagai sumber asli yang boleh dioptimumkan selain berpotensi memajukan industri lain berbanding terlibat dengan perniagaan berkaitan sisa plastik. Pendekatan seimbang harus dirangka membabitkan kepentingan awam, alam sekitar dan pengusaha industri, sekali gus menangani risiko Malaysia dijadikan ‘tong sampah’ sisa plastik negara maju.

**NORASHIKIN
MOHAMAD NAWAWI**

Universiti Putra Malaysia



MESKIPUN mampu menjana pendapatan negara, industri sisa plastik boleh mengganggu kesejahteraan kehidupan manusia dan ekosistem. -GAMBAR HIASAN/AFP